



FYLKESMANNEN I SOGN OG FJORDANE

Sakshandsamar: Anne Sigrid Loftesnes Harjo
Telefon: 57643146
E-post: fmsfash@fylkesmannen.no

Vår dato
25.06.2013
Dykkar dato

Vår referanse
2013/1925 - 431
Dykkar referanse

Småkraft AS
Postboks 7050
5020 BERGEN

Småkraft AS - Løyve etter ureiningslova til dumping av sprengstein i Veitastrondvatnet

Vi viser til søknad datert 26.04.2013.

Småkraft AS har søkt Fylkesmannen om løyve til å dumpe 10 000 m³ sprengingsmasser i Veitastrondvatnet i samband med utbygging av Holen kraftverk i Luster kommune.

Med heimel i § 11 og § 16 i Lov av 13.mars 1981 om vern mot forurensninger og om avfall (ureiningslova), gjev Fylkesmannen i Sogn og Fjordane med dette Småkraft AS løyve til å dumpe sprengsteinmassar ved omsøkt lokalitet. Løyvet er gjeve med vilkår.

Løyvet gjeld frå d.d og inntil 1 år. Dersom tiltaka ikkje vert gjennomført innan denne tida fell løyvet bort. Alternativt må søkjar i god tid søkje om forlenging av løyveperioden.

Vilkår for løyvet

1. Dumping og utfylling med sprengstein skal gjerast på ein slik måte at finpartikulært materiale i minst moglege grad vert spreidd til omgivnadene. For å sikre dette skal utfylling skje ved hjelp av automatiserte turbiditetsmålarar som vert utstyrt med alarmfunksjon. Det må etablerast ein overvåkings- og tiltaksplan for dette.
2. Dumpestad av sprengstein skal vere i samsvar med søknad.
3. Der terreng og grunnforhold ligg til rette for det, skal avløpsvatn leiast gjennom lausmassar før utslepp til sjølve fjorden.
4. Boreslam skal deponerast slik at vassdraget ikkje blir ureina, og det skal sikrast mot flom og utvasking. Dersom slammet er ureina må det leverast til godkjent mottakar av ureina masser.
5. Tiltaket skal gjennomførast slik at det ikkje oppstår unødige ulemper for andre brukarinteresser i området. Tiltakshavar skal straks stogge arbeidet og melde frå til fylkesmannen dersom det oppstår ulempe/skade som følgje av arbeidet.
6. Det skal utarbeidast ein sluttrapport der resultat av arbeidet blir presentert og vurdert i høve til dei vilkåra som er sett i løyvet. Rapporten skal m.a. innehalde:
 - Opplysningar om kor mykje massar som faktisk vart dumpa (rekna i m³ eller tonn).
 - Plassering av massane (posisjon)

Hovudkontor
Njøsavegen 2, 6863 Leikanger
Telefon: 57 64 30 00
Telefaks: 57 65 33 02
Org.nr 974 763 907

Landbruksavdelinga
Fjellvegen 11, 6800 Førde
Postboks 14, 6801 Førde
Telefon: 57 64 30 00
Telefaks: 57 82 17 77

E-post:
fmsfpost@fylkesmannen.no
Internett:
www.fylkesmannen.no/sfj

- Omtale om korleis arbeidet er gjennomført med særskilt omtale av ev. avvik i høve til plan/søknad med grunngjeving

Rapporten skal sendast fylkesmannen seinast 6 veker etter at arbeidet er avslutta.

Høyringsuttale

Søknaden har vore lagt ut til offentleg gjennomsyn i tida 30.mai til 20.juni. Det har komme inn ein merknad til søknaden.

Roger Karlsen, bebuar på Hestnes på Hafslo: viser til at anleggsvirksomheit vil gi betydeleg utslepp av olje og anna drivstoff som vanskeleg let seg samle opp når det har lekt ut i ei steinrøys. Uttaler er bekymra for at tiltaket vil føre til ei ytterligare belastning på drikkevatnet, særskilt med avsetjing av radon frå massane.

Søkjjar har kommentert innkomen merknad med at det kan vere radioaktive element i massane som produserer radon, men at dette ikkje vil vere eit problem for drikkevatnet.

Grunngjeving for avgjerda

Småkraft AS har søkt Fylkesmannen om løyve dumping av 10 000 m³ sprengstein i Veitastrondvatnet i samband med utbygging av Holen kraftverk i Luster kommune.

Utbygging av Holen kraftverk vil føre til sprenging av krafttunnel. Vilkår i konsesjonen frå NVE er at det ikkje skal byggast vegar i samband med utbygging av Holen kraftverk. Søkjjar har vurdert, ut i frå eit miljø omsyn, at den beste løysinga er å bruke massane lokalt til utfylling for å etablere ein kai i framkant av kraftverket som vil sikre tilkomst til kraftverket for framtidig drift. Resterande massar skal dumpast frå land. Anleggsperioden er planlagt å vare i 3-9 månader.

Eit kvart utslepp av ureining til fjorden er i utgangspunktet uheldig, anten det er snakk om steinpartiklar eller sprengstoffrestar. For å få best mogeleg utskiljing av partiklar, er det føresett at borevatn vert forsøkt filtrert i lausmassar før utslepp til resipient. Ein vil då kunne oppnå betre fjerning av dei minste partiklane. Fylkesmannen gjer merksam på at for oljehaldig avløpsvatn er det reinsekrav med bruk av eige sandfang og oljeutskiljar før utslepp. Konsentrasjon av olje i avløpsvatn er 50 mg/l ved maksimal vassmengd. Bergarten ved Holen kraftverk er av typen raudleg grov til storkorna granitt og gir generelt lite finstoff ved oppbrytning. For å sikre eventuell utlekking av finmateriale (sand/silt fraksjonar) set Fylkesmannen vilkår om tubiditetsovervaking ved utfylling.

Fylkesmannen tek atterhald om at det kan bli kravd ytterlegare tiltak om dette skulle vise seg nødvendig. Ein viktig føresetnad er elles at det vert god drift og oppfølging av anlegget og utsleppsstad for borevatn.

Varsel om gebyr for sakshandsaming

Etter ureiningsforskrifta kap. 39, skal det betalast gebyr til statskassa for fylkesmannen sin behandling av søknader etter ureiningslova og forskrifter til denne.

På grunnlag av opplysningane som er gitt, er behandlinga av søknaden plassert under gebyrsats 4, det vil seie kr 20 100,-, jf. §§ 39-3 og 39-4 i forskrifta.

Dersom vi ikkje mottok merknad på varselet, vil vi fatte vedtak om gebyr. Faktura med innbetalingsblankett vert ettersendt frå Klima- og forureiningsdirektoratet (Klif). Gebyret må betalast innan 30 dagar etter fakturadato. Vedtaket om gebyr kan påklagast til Klif, jf. § 28 i forvaltningslova. Klagefristen er 3 veker etter at vedtaket gjeld. Ev. klage bør vere skriftleg

grunnngjeven og den skal sendast via Fylkesmannen som vil vurdere endring av vedtaket eller sende saka vidare til klageorganet for endeleg vedtak. Ein ev. klage vil ikkje få oppsetjande verknad, og det gebyret som er fastsett ovafor må betalast inn. Dersom klageorganet tek klagen til følgje, blir for mykje innbetalt beløp refundert. Løyvehavar må pårekne nye gebyr for eventuell framtidig søknad om endring av løyvet, og for kontrollar utført av fylkesmannen.

Endring eller attendekalling av løyvet

Fylkesmannen kan gjere om eller setje nye vilkår for løyvet, ev. òg trekkje løyvet attende etter reglane i § 18 i ureiningslova.

Ansvar

Sjølv om løyve er gjeve, pliktar den ansvarlege å svare erstatning som måtte følgje av ureiningslova og av vanlege erstatningsreglar, jf. kapittel 8 og 10 i ureiningslova. Dette løyvet frittek ikkje søkjaren å hente inn nødvendige løyve eller samtykkje frå andre styresmakter eller private.

Offentleggjing av løyvet

Ålmenta skal gjerast kjent med vedtaket, jf. § 36-11 i ureiningsforskrifta; kap. 36 «*behandling av tillatelser etter forurensningsloven*». Vedtaket vert kunngjort offentleg for dykka rekning. Kunngjeringa vil innehalde ei kort orientering om løyvet, kvar ein kan vende seg for å få innsyn i saksdokumenta, og opplysningar om klageinstans og frist for ev. klage på vedtaket.

Om klageretten

Partane og andre med klagerett etter forvaltningslova kan klage over avgjerda innan 3 veker etter at avgjerda er motteken, jf. forvaltningslova § 29. Klageretten gjeld òg vedtak om gebyr for saksbehandlinga, jf. § 41-5 i ureiningsforskrifta. Eventuell klage bør grunnjevast skriftleg og skal rettast til Klif. Klagen skal sendast til Fylkesmannen i Sogn og Fjordane.

Med helsing

Gøsta Hagenlund
assisterende fylkesmiljøvernshjef

Anne Sigrid Loftesnes Harjo
overingeniør

Kopi pr. e-post/EDU: Luster kommune